

EKALESIA FAAPOTOPOTOGA KERISIANO I AMERIKA SAMOA
OFISA O A'OA'OGA KERISIANO



VASEGA AMATA LUA

5 - 7 Tausaga



AUKUSO - TESEMA

2019

ASO SA – AUKUSO 11, 2019.

MATAUPU: “UA AVEA SAULO MA TUPU.”

TUSI FAITAU: I SAMUELU – 11: 12 – 15.

SINI E TULILOAINA:“Ia a’oa’oina tamaiti ia iloa o Saulo o le ulua’i tupu o Isaraelu, ae aisea foi na filifilia ai o ia e fai ma tupu, ma ia iloa e tamaiti, e ‘ese mea e mana’o i ai tagata,‘ese mea e finagalo ai le Atua. “

Fa’atomuaga: Ua taumafai e vavae le Vasega Amata i vasega e lua. O le Vasega Amata Lua lenei, e amata mai i le 5 – 7 tausaga. O le fa’amomoe, o fanau ia ua amata ona matala lelei la latou fa’alogo ma taofi mau i mea e fa’alogo ma va’ai iai. E ui lava ina lē tutusa pea le malolosi o mafaufau, a’o le mea mautinoa o tausaga, ua iloa mea o le olaga. O le vasega lea o le ā amata ai ona talatala atu teisi le malamalama o fanau itala o le Tusi Paia, ma tagata tā’ito’atasi, e pei ona fa’alauiloaina ile Vasega Amata Muamua. E tumau pea le lagona ina ia lē faigatāi fanau laiti ia le a’oa’oina o tala o le Tusi Paia. O le gagana ma fa’atinoga aupito faigofie, e matuā fautuaina e a’oa’oina ai Vasega Amata uma e lua.

Fesoasoani mo le mataupu.

1. E lelei ona amata i’inei ona fa’amasani le faitau Tusi Paia a le fanau i nai fuaiupu ua tu’uina atu i le Tusi Faitau. Tu’u pea le avanoa e taumafai ai e faitau lava le tamaitiiti ia, ae fa’asa’osa’o e lau Susuga a le faiaoga. Pule lau Susuga pe faitau fa’atasi pe auua’i le vasega.
2. Mo le mataupu o lenei Aso Sa, e lelei ona e silasila i le mataupu e 10 ma le 11, e manino lelei ai sau tapenaga manaia mo le fanau.
3. Ia manatua, o le mavae o Fa’amasino o Isaraelu, o i latou ia sa pulea Isaraelu i taimi na nofoia ai Kanana. O i’ina na tupu a’e ai le mana’o o tagata ina ia fai so latou tupu, e pei ona faia e isi malō.
4. O Saulo ia, na fa’au’uina ai loa e fai ma ulua’i tupu o Isaraelu, e tusa o le finagalo o le Atua ae lē o tagata.
5. O Saulo, o le atalii o Kiso mai le ituaiga o Peniamina. O lona nu’u o Kipea. O ia o se tagata loto maulalo, auā o lona manatu, o ia e sau mai le ituaiga aupito itiiti o Isaraelu.(I Samuelu– 9:20-21)
6. O Saulo o se tagata lotomaulalo ma loto fesoasoani, e tino lelei ma aulelei ma tino malosi, o ia na tā’ita’ia Isaraelu i le taua ma Amoni ma manumalo ai, e fesoasoani iā Iapese- Kiliata.
7. Sailiili pea lau susuga i nisi fa’amatalaga faigofie e fa’atatau ile avea o Saulo ma tupu o Isaraelu.
8. Tautuana lava ia faigofie le gagana ma upu e malamalama ai le fanau, aua foi le so’ona naunau e fa’amatala atoa le tala, ae ‘oto’oto nai mea tāua e pei ona tu’uina atu i le sini autu, ma sau fa’aopoopo faigofie i ai, ua lava ma totoe lena mo lenei Aso Sa. E leaga le umi, ae leai se mea e maua ma taofi mau e le fanau.

Galuega Fa’atino:

1. E fuafua leleie lau susuga le taimi ina ia paleni, aua foi le umi i le fa’amatalaina o le tala, a ua lē fia fa’alogo le fanau iāte oe, e tupu ai lou ita. E tāua tele foi galuega fa’atino e fiafia ai tamaiti.
2. O fanau ia ua iloa tusi ata, e lelei ona tufa i ai ni pepa, e tusi ai le ata a le tamaitiiti lava ia, ma fa’amatala e ia le uiga o lana ata i le vasega, po’o le a’oga Aso Sa atoa foi.
3. Ia fa’amanino lelei itamaiti le uiga o le ata o le ā ia tusia, ia feso’ota’i aga’i i le mataupu. Fa’ata’ita’iga: Ia tusi ane se ata o Saulo ma ana teuga fa’atupu. Fesoasoani iai lau Susuga e tā’u i tamaiti teuga a le tupu, ae tusi e latou, ma nisi ata faigofie mai le tala..

4. Fa'amolemole ia maua le fiafia o fanau, ae aua e te ita, pe lelei pe leaga, sa'o pe sesē, ia e fai atu i ai, lelei tele le tama po'o le teine lea. E sili atu lou silasila atu ua toe alu ane i le isi Aso Sa, i lou fiu e fa'atali ua musu si tamaitiiti. Manatu foi e 'ese'ese lava matua. Fai atu ai foi.

la silafia: Fa'amolemole, e lelei ona fa'amanatu i tamaiti le Tusi Paia ma le pese i Aso Sa uma. E tatau foi ona i ai se api po'o ni pepa tusi ata, ma ni ana vali e fa'aaoga i le vasega. E fautua atu ia saunia foi se api a lau Susuga a le faiaoga, e fa'amaumau ai togi o le fanau. Ia togi galuega a le fanau ma fa'amaumau i se api mo le fa'ai'uga o le tausaga. Ia fa'amalo ma fa'afetai i tamaiti, ma taumafai e fa'atosina i le a'oga mo le isi vaiaso. E tamāoaiga lava lau Susuga i le vaega lea. Aua le taofia fa'amolemole.

Fesili:

1. O ai le ulua'i tupu o Isaraelu? **Tali:** O Saulo.
2. O ai na fa'au'uina Saulo e fai ma tupu? **Tali:** O Samuelu.
3. O fea le nu'u o Saulo? **Tali:** O Kipea.
4. Aisea na manana'o ai tagata i so latou tupu? **Tali:** Fia fa'ata'ita'i i isi malō.
5. Na mana'o le Atusa e fai se tupu o Isaraelu pe leai? **Tali:** Leai.
6. Aisea? **Tali:** E mana'o le Atua ia fai pea o IA ,(le Atua), ma tupu i lona nu'u o Isaraelu.
7. O ai le tamā o Saulo? **Tali:** O Kiso.
8. O nai fesili ia e tuliloa e lau Susuga ia tapena ai fanau ia mo le aga'i atu iluma. E lē se agasala le fa'aopoopo e lau Susuga nisi fesili, pe ā talafeagai ma le taimi.

A'oa'oga:

1. O le ā taoto atu lava ilau Susuga le vaega lea i lou silafia e gafatia e tamaiti ona taofi ma malamalama i ai. A'o le manulauti o le sini autu, ia fa'alogu, manatua, taofi nai fesili amata ia e uiga i le tagata o Saulo i lona aveai ai ma ulua'i tupu o Isaraelu.

Pese: Ou te iloa o lau taleni le fatu pese, e lelei ona saunia sina pese pu'upu'u mo le fanau, afai foi e leai, o le vasega tonu lenei e tatau ona amata ai ona a'oa'oina fanau iā tatou lava pese o le Tusi Pese. O le mea uamautinoa, ua amata ona lē iloa e fanau a tatou pese. Toe taumafai e fa'amanatu si vaega tāua lea. O le mea e lē natia, ua o'o lava iisi tagata matutua, e lē iloa pese a le tatou Ekalesia, vagana ai pese masani ma usu so'o. I le ma lenei, ua leiloa atu ai ma ā tatou fatuga tuai mananaia o ā tatou pese. O le fa'afitauli, ua leai ni lotu i le aiga i le afiafi. E sili foi ona loloto ma uigā, ma fetau lelei a tatou pese, i tala o leTusi Paia.

Tatalo: E silafia lelei e lau Susuga le mafai ma le lē mafai ona tatalo to'atasi se tamaitiiti o le vasega lea. Afai e mafai, lelei tele, ae lelei ona ta'ita'i e lau Susuga le tatalo ae mulimuli atu le fanau iāte oe.

Manuia tele le amataga o a'oga i lenei lima masina.



ASO SA – AUKUSO 18, 2019.

MATAUPU: “UA FAI TAVITA MA TUPU.”

TUSI FAITAU: I SAMUELU – 16: 11 – 13.

SINI AUTU: “Ia taofi i mafaufau o tamaiti le tagata o Tavita na avea ma tupu o Isaraelu, o le filifiliga mai le Atua. Fa’amaite nisi tala e uiga iā te ia. (Tavita).

Fesoasoani mo le mataupu:

1. O le fautuaga, a’o e tapena i lenei vaiaso, ia faitau atoa le mataupu e 16, o i’ina o lo’o fa’amatalaina ai le mafua’aga na fa’au’uina ai Tavita e fai ma tupu o Isaraelu. O le filifiliga lava mai le Atua, ina ua lē usitai le ulua’i tupu o Saulo i le Atua, na lafoa’i ai e le Atua ae fa’au’uina Tavita e fai ma tupu o Isaraelu.
2. Na fa’asolosolo ane le fanau e to’afitu a lese i luma o le ositaulaga o Samuelu, o tagata tino lelei ma malolosi, peita’i, na fetalai le Atua iā Samuelu, nate le’i filifilia se tasi o i latou na. Na fesili Samuelu po’o ua uma mai tama, ae fai ane lese, toe o le ui’i o lo’o i le vao, o lo’o leoleo i le lafu mamoe a le aiga.
3. Sa a’ami Tavita, ona fa’atonuina lea e le Atua Samuelu e fa’au’u iā te ia e fai ma tupu. “Tula’i ia inā fa’au’u ia iā te ia, auā o ia lava lenā.” O le avea o Tavita ma tupu o le filifiliga lava mai le Atua.
4. Aua le taofia le fa’alateleina o nai manatu na e lau Susuga i se gagana faigofie mo tamaiti, ma nisi fesili talafeagai lelei ma lo latou malosi fa’alē-maufaufau.

Galuega Faatino: Fesili

1. O ai Tavita? **Tali:** O le atalii o lese.
2. O le ā le galuega a Tavita? **Tali:** O le leoleo mamoe.
3. O ai na fa’au’uina Tavita e fai ma tupu o Isaraelu? **Tali:** O Samuelu.
4. Aiseā na filifilia ai Tavita e fai ma tupu? **Tali:** Ona ua lē usita’i Saulo le ulua’i tupu o Isaraelu i le Atua.
5. E to’afia atalii o lese? **Tali:** E to’afitu.
6. Aiseā na le filifilia ai le ulumatua e fai ma tupu. Fai mai le tala e tino lelei toe maualuga? **Tali:** Auā e va’ai le tagata i le tino, a’o le Atua e silasila i le loto o le tagata.
7. Ai foi se manaia ae amata ona fa’amaite i ai igoa o le fanau tama a lese e to’afitu.
8. Tautuanā ia faigofie lau tapenega i le gagana e te fa’aaogaina.

Galuega e ave i le fale.

1. Tusi i se pepa po’o latou api, igoa nei e to’afitu i tamaiti, e ave ile fale e fesoasoani i ai lona tamā ma lona tinā, e a’oa’o i fanau. O le galuega e fai fa’atasi a lau Susuga ma mātua.
2. **(a). Eliapo. (e). Apinatapa. (i). Sama. (o). Natanielu. (u). Ratai. (f). Osema. (g). Tavita.**

Tusiga ata. Pule lau Susuga i se ata e fiafia ai le tamaitiiti e tusi i lenei Aso Sa.

Pese: Saunia se pese pu’upu’u e fa’ai’u ai le mataupu.

Tatalo: Fa’ai’u i le tatalo a le Alii e tauloto fa’atasi e le fanau.

Malō le fa’amalolosi i lenei taeao. Manuia le galuega o feagai ai.

////////////////////////////////////

ASO SA – AUKUSO 25, 2019.

MATAUPU: “UA AVEA SOLOMONA MA TUPU.”

TUSI FAITAU: I TUPU – 1: 42 – 46.

SINI AUTU: la a’oa’oina tamaiti i nisi tala iā Solomona, ma ia iloa e le fanau, o le usita’i ma fa’aaloalo i mātua e fa’amanuiaina ai le tamaitiiti e le Atua.”

Fesoasoani molau Susuga i le faiaoga:

1. E tāua pea le silasila ane i nai tusi ia e fesoasoani mo lau tapenega i lenei Aso Sa. O le Tusi faitau o lenei Aso Sa ma le (ii. Samuelu – 7: 12 – 13).
2. Ina o avea Tavita ma tupu iā Isaraelu, sa fetalai ane ai le Atua e ala iā Natano le perofeta, e uiga i le tofia o Solomona e fai ma tupu.
3. (ii.Samuelu – 7: 12 – 13), “A fa’aatoatoaina ou aso ma e ta’oto fa’atasi ma ou tamā, ona ou fa’atuina ai lea o so lau fanau, pe ā mavae atu oe, e tupu mai iā te oe, ou te fa atumauina foi lona malō. O ia lava nate faia se fale mo lo’u igoa, ou te fa atumauina foi lona malō e fa’avavau.
4. O Atonia, o le atalii o Tavita, peita’i, na alu ‘ese mai lona tamā inaua fa’amalosi e ia ona fa’au’u o ia lava, e fai ma tupu, ae lē iloa e lona tamā.
5. Na ta’u e Patisepa le avā a Tavita, ma le perofeta o Natano le mea ua faia e lona atalii o Atonia. Aemaise, na fa’amanatu i ai e Patisepa iā Tavita lana tautoga, e fai Solomona lona atalii ma tupu pe ā mavae o ia.
6. E leai se tala tele ua maua e uiga iā Solomona a’o le’i avea ma tupu. O Solomona, na fa’aigoaina e Natano le perofeta iā letitaia ina ua fanau mai, o le uiga o le igoa letitaia, “ua alofaina e le Atua.”
7. Fai mai le tala sa nofo lava Solomona i tafatafa o lona tamā se’ia o’o ina maliu. O inā lava sa tofia mai ai Solomona e avea ma tupu o Isaraelu. Na ilia pu ma alalaga tagata ia soifua le tupu o Solomona, ona o le fiafia ua fai Solomona ma tupu.
8. Fa’amolemole ia faigofie le gagana e faamatala ai le mataupu, o le tusi e mo lau tapenega, ae lē faitauina i le vasega.

Mea tāua e ao ina iloa e tamaiti:

1. Toe faamanatu fesili o le mataupu i le vaiaso ua te’a, ma fa’ataitai pea ona faitau le Tusi Paia.
2. E mafai ona fa’amamafa le tāua o le usita’i i matua e maua ai le mea lelei pe ā fa’amatala le tala. E mafai foi ona fa’aopoopo e lau Susuga le tāua o le ava ma le fa’aaloalo pe a talafeagai ma tamaiti. O uiga ia e tataua ona ola ai le tamaitiiti e manuia ai mai le Atua.
3. E ao ina iloa e tamaiti e lua atalii o Tavita. O Atonia le tama matua, ma Solomona. Ina ua toeaina lava Tavita ona manatu lea o Atonia o le ā fa’au’u e ia, ia lava, e fai ma tupu, peita’i, na tofia e Tavita Solomona e fai ma tupu.
4. Ia silafia e lau Susuga nisi o igoa o lo’o ta’ua i le tala, ae pule lava lau Susuga pe fa’amaite i fanau pe leai, ina ia lē nunumi ai nai tamaiti. O le isi la’asaga lenā o le lumana’i.
5. O Penaia: O le atalii o loata, o le ta’ita’i o le ‘au Kereti ma le ‘au Peleti.
6. ‘Au Kereti ma le ‘Au Peleti: O fitafita fa’apitoa a le tupu o Tavita. O nei tagata e lē o ni tagata Isaraelu, a’o tagata mai isi malō na fa’ato’ilaloina e Tavita. Na filifilia fa’apitoa e Tavita i latou e galulue i totonu o lona maota, e ‘ese mai i fitafita a le malō atoa o lo’o avea ai loapo ma ta’ita’i.

Galuega Fa’atino: Fesili.

1. O ai le tamā o Solomona? **Tali:** O Tavita.
2. E to’afia atalii o Tavita? **Tali:** E to’alua.
3. O ai igoa o atalii o Tavita? **Tali :** O Atonia ma Solomona.
4. O ai e matua?**Tali:** O Atonia.
5. Aiseā na alu ‘ese ai Atonia mai lona tamā? **Tali:** Ona ua fa’au’u e ia, ia lava e fai ma tupu ae lē iloa e lona tamā o Tavita.
6. E lelei le mea na fai e Atonia pe leaga? **Tali:** E leaga. (Fa’alautele teisi e lau Susuga le mea e leaga ai.)
7. O ai foi le avā po’o le to’alua oTavita? **Tali:** O Patisepa.
8. O ai le isi igoa o Solomona na fa’aigoa ai e Natano le Perofeta? **Tali:** O Ietitaia.
9. O le ā le uiga o le igoa o Ietitaia? **Tali:** “ua alofaina e le Atua.”
10. Pe afai e lelei tapena lenei mataupu, ia ave i le fale fesili nei e fesoasoani ai matua i le vaiaso, ina ia lē galo i fanau. Pei lava ona taumafai atu, o le galuega e fai fa’atasi, ta’u i nai matua, o fanau a oe ma a’u, ae lē moe ia, ae tigaina oe e a’oa’o le tama a le isi lo’omatua. Fai atu ai foi.

Pese: Saunia e lau Susuga se pese e fa’ai’u ai le mataupu. E fautua atu i le agagamaulalo, e lelei lava a tatou pese o le Tusi Pese e ‘anoa mo mataupu.

Tatalo: Saunia e lau Susuga se tatalo e fa’ai’u ai le a’oga, ona tatalo fa’atasi lea ma tamaiti i le tatalo a le Alii.

Manuia le a’oga i lenei Aso Sa, alofa tele atu.



ASO SA – SETEMA 01, 2019. “ASO SA O LE TALALELEI.”

MATAUPU – “O LE TALALELEI IĀ IESU TOETU.”

TUSI FAITAU – MATAIO – 28: 19 – 20.

SINI E FA’AMAMAFAINA: Ia amata ona fa’amautū le iloa o fanau i le mafua’aga e ala ai ona fa’amanatu pea lenei Aso tāua.

Sina fesoasoani mo lau Susuga a le Faiaoga:

1. E masani lava ona fa’alogoina upu o le Tusi Faitau i sauniga o le Aso Sa o le Talalelei. E mafua lea ona o le fa’atonuga lea a Iesu Toetu i lona ‘au so’o e fa’avae ai le tala’iina o le Talalelei i le fa’aolataga na ia maliu ma toetu ai, mo le lalolagi agasala.
2. O lona uiga, afai o le fa’atonuga a Iesu, o le Talalelei ia e talai atu e le ‘au- so’o ma tagata Kerisiano e i ai ma tatou, o le tala i le ola. O le tala iā Iesu ua toetu mai le oti, o le Atua o lo’o soifua pea, ua tatou manuia ma maua ai le ola.
3. Aua le faigata le fa’amatalaina o le Tusi Faitau fa’amolemole. O lau tapenaga lava i le vaiaso o le ā e lē popole ai pe fa’apefea ona fa’amatala le mataupu fa’a-faigofie i tamaiti.
4. O le mea tāua lava ia amata ona fa’amautū le iloa o le fanau i le ala e fa’atāua ma fa’amanatu ai e Kerisiano ma tatou foi le Aso Sa o le Talalelei.

Galuega Fa'atino:

1. Pe afai e lelei tapena lau Susuga a le faiaoga, ua ou manatu ai foi, e lelei ae amata ona fa'amaite i fanau laiti ia, le tala i le o'o mai o le Talalelei i Samoa, ae fa'avae i le fa'atonuga lea a le Alii i ona so'o.
2. Ua ou manatu e tatau ona iloa uma e tamaiti uma o le Ekalesia, le tala lea i lona o'o mai i Samoa, ae amata m'alie i nai mea faigofie e fa'amaite i fanau.
3. A maua lava le suafa o Viliamu e amata ai le iloa, ua selau pasene, e fua lava e lau Susuga a le faiaoga i le malosi o nai tamaiti.
4. O se fesoasoani tele mo lau Susuga pe ā e silasila ane i le Tusi o le Talafaasolopito o le Ekalesia Samoa, e maua ai ni ou manatu i le vaega lea, ma faigofie ai ona e fuaina le mamafa e a'oa'o atu i fanau, ae aua lava nei tele ma faigatā.
5. Fa'amasani pea le faitau Tusi Paia a le fanau i le amataga o le vasega fa'amolemole. Ia fa'asa'osa'o le fa'aleoina o upu, ma fa'amalamalama ni upu e faigatā tele uiga i le fanau.
6. Ia saunia e lau Susuga ni nai fesili mo le mataupu o lenei Aso Sa. Ia fua lava le faigofie o fesili ia pei o fesili o mataupu ua tuana'i.
7. O le fautuaga lava ia togi tali a tamaiti ma fa'amaumau i lau api. Pule lava lau Susuga pe tali fa'atasi pe taito'atasi. Ia maua le fiafia o tamaiti.

Galuega mo le aiga:

Ia ta'u i tamaiti e o e amata ona tauloto fuaiupu o le tusi faitau, ia matutua a'e, ua pi tautau le fa'atonuga fa'a-auro lea a le Alii Toetu i nai fanau. O le galuega e fesoasoani ai mātua. E tatau ona aua nei galo i lau Susuga le galuega lea ile Aso Sa o lumana'i, e iloa ai le mātua fa'amaoni ma le tamaitiiti e fiafia i le Aoga Aso Sa. Ave i ai se togi ma fa'afetai ma i nai fanau, ma fa'amalosi pea i ai. E lē se agasala pe ā fa'aaauu pea ma tauloto tau'ave se'a o'o ina maua lelei e fanau. Aua le vave tu'ua ne'i leiloa i tamaiti.

PESE: E lelei iā te a'u le fa'amasani i si tatou pese lea. O le pese e #247. Lava sina fuaiupu e tasi.

Tatalo: Saunia e lau Susuga se tatalo mo le Aso Sa lenei, ae fa'ata'ita'i e le fanau.

Manuia tele le Aso Sa o le Talalelei i lau Susuga ma le fanau. alofa atu.

////////////////////////////////////

ASO SA – SETEMA 08, 2019.

MATAUPU - "UA LĒ USITA'I LE TUPU O SOLOMONA I LE ATUA."

TUSI FAITAU: I TUPU – 11: 9 – 13.

SINI E FIATULILOAINA: Ia a'oa'o le fanau ia mamafi lo latou ola i le iloa e leaga le i'uga o le tagata lē usita'i.

Sina fa'asoa mo le mataupu:

1. E manino ma malamalama lelei le vaega o le tusi sa faitauina. O lo'o ta'ua ai le fetalaiga **toasā** a le Atua iā Solomona le tupu, ina ua lē usita'i Solomona **ipoloa'iga** ma **fa'atonuga** a le Atua iāte ia.
2. Ua **liliu'eseina** le loto o Solomona i le Atua o Isaraelu, na fa'aali fa'alua iāte ia. Na **poloa'i** foi le Atua iā Solomona aua ne'i mulimuli atu i atua 'ese, ae na **lētausia** foi e Solomona.

3. Ona o le lē usita'i o Solomoana i le Atua, o le mea lea na fetalai ai le Atua iāte ia, o le **āsae'eseina** le malōmai iāte ia, (Solomona).Peita'i, e lē faia e le Atua iā Solomona, ae fa'atoa sae'eseina ai lima o lona atalii pe ā avea ma tupu.
4. E **lēave'eseina** foi le malō uma, ae tu'uina le ituaiga e tasi i lona atalii, ona o Tavita le tamā o Solomona, ma Ierusalemā na **filifilia** e le Atua.
5. Ia fa'amamafa i le fa'amatalaina o le tala le leaga o le lē usita'i o Solomona, ma le tauai na ia maua mai le Atua.

Galuega fa'atino:

1. Fa'aauau pea ona fa'amasani le faitau a nai tamaiti. O upu ua vaseina atu ma fa'aolaola, o le ā ta'oto atu i lau Susuga e fa'amalamalama i ni fa'ata'ita'iga faigofie.
2. Fa'amatala fa'a-faigofie le tala, e lelei pea le faitau o isi mataupu e taumasuasua ai lou silafia i le mataupu o le nei aso.
3. E leai se manatu o le ā tele ni fesili o lenei Aso Sa, e saunia lava nai fesili faigofie e lau Susuga , e fa'amausalī ai le iloa o le tala, a'o e fa'amatalaina.
4. Ae lelei ona momoli loa i loto ma mafaufau o tamaiti, sina a'oa'oga tāua o lo'o manino mai le tala.

O mea na iloa ai le lē usita'i o Solomona ile Atua:

1. Liliu'eseina lona loto mai le Atua o Isaraelu, ae mulimuli atu i atua 'ese.
2. Ua ia lē tausia poloa'iga na fetalai ai le Atua iā te ia.

A'oa'oga: Ia fa'amamafa i tamaiti le lelei o le usita'i ma lona tauai, aemaise foi o le leaga o le lē usita'i ma lona foi tauai. Tausisi pea i le tala e fa'amautū ai le tauai o le lē usita'i e pei ona fai iā Solomona.

Pese: Fa'alogo ma usita'i e leai se isi ala, e fiafia ai Iesu na o le fa'alogo ma usita'i.....(2x).

Tatalo: E lelei pe ā amata ona tatalo le fanau matutua o le vasega lea i le tatalo a le Alii e fa'ai'u ai le aoga i lenei aso. Tatalo se tamaitai e amata ai, ona feauaua'i lea i le aga'i i luma.

Manuia tele le galuega o lenei aso sa.



ASO SA – SETEMA 15, 2019.

MATAUPU: “UA TU’UINA ATU SAMUELU E AUAUNA I LE ALII.”

TUSI FAITAU - I SAMUELU – 1: 19 – 28.

SINI AUTU: Ia fa'amaite i tamaiti le iloa, ia tu'uina atu le ola o le tama ma le teine ia aogā i feau a le Alii.”

Fesoasoani mo le Faiaoga:

1. E lelei le faitau atoa o le mataupu muamua o le Tusi Faitau o le asō, o le ā oa ai lau tapenaga mo le matupu, aua o i'ina o lo'o aumai ai le tala ma'ea o le punoua'i o Hana i luma o le Atua i le tatalo, ia foa'i mai se tama mo ia. Atoa ai ma le tautoga a Hana, nate toe tu'uina atu lava le tama i le Atua e auauna ma faia feau a le Atua i aso uma o lona ola.
2. O le fa'auuina ma le fa'ai'uina o le tala lenā lea e i ai la tatou Tusi Faitau. Na foa'i e le Atua le tama iā Hana e tusa o le mana'o o Hana. Na toe tu'uina atu e Hana le tama o Samuelu i le malumalu e auauna ai i le Atua i lona olaga atoa.

3. E malamalama le tala ma manino, ae fa'amolemole ia faigofie ona fa'amatala i le gagana e malamalama ai le fanau.

Galuega Faatino:

1. Taumafai foi e fa'amalamalama ni nai upu e fou i fanau mai le Tusi Faitau sa faitauina.
2. Fa'amatala le tala i ni fa'ata'ita'iga faigofie i le olaga o le fanau i aiga, ma ā latou feau masaniona fai. Ona taumafai loa lea e momoli i ai le tala o le Aso Sa lenei iā Samuelu na ave e lona tinā ile malumalu e faia feau a le Alii.
3. E mafai foi ona fa'atino le vaega lea o le tala, pe ā tusa ai ma sou finagalo lau Susuga a le faiaoga. Ae fa'aaoga tamaiti e fa'atinoina ae fa'ata'ita'i e lau Susuga.

O nai tagata i le tala e tatau ona amata fa'alogo i ai le fanau.

1. **O Elekana:** o le atalii o leroama, mai Ramata – sofimo i le mauga o Efaraima. E to'alua ana avā, o Penina ma Hana. O Elekana o le tamā o Samuelu.
2. **O Hana:** O le isi to'alua o Elekana, e leai sana tama e lē fanau.. O le tinā o Samuelu, na foa'i i ai e le Atua
3. **O Penina:** O le isi to'alua o Elekana, e fai lana fanau,
4. **O Eli:** O le ositaulaga po'o le faitaulaga i le malaumalu.
5. **O Samuelu:** O le tama a Hana na foa'i mai e le Atua, i lana tatalo fa'atauina i le ao ma le po e fia maua sana tama.. Na toe ave pe tu'uina atu e Hana Samuelu e faia feau a le Alii ilemalumalu.
6. O le uiga o le igoa o Samuelu: "Ua fa'afogaina e le Atua"
7. Fa'ailoa pea e lau Susuga nisi tagata ua lē ta'ua, a ia fua lava i le mafai ona taofi e le fanau.
8. E lelei le saunia e lau Susuga nai fesili e fa'amautū ai tagata o le tala ua ta'ua, ma nisi fesili e te silafia ua talafeagai mo le fanau.

Sina a'oa'oga faigofie:

1. Fa'amamafa ma fa'atāua i tamaiti le fiafia e omai i le Falesā i Aoga Aso Sa, ma le lotu ma mea uma e fai mo le Atua, e amata atu i'ina le ola tu'uina atu mo feau a le Alii.

Pese: Manaia le fuaiupu muamua o le pese #157. Fa'amasani ai pea se'ia o'o ina maua uma le pese, pe ā maua taimi avanoa.

Tatalo: Fa'aiu e se alii i le tatalo a le Alii ma fa'ata'ita'i ai tamaiti uma.

Manuia tele le a'oga i lenei Aso Sa, alofa atu mo outou ma tamaiti.

////////////////////////////////////

ASO SA – SETEMA 22, 2019.

MATAUPU: "O LE ATUA LO TATOU LEOLEO SILI"

TUSI FAITAU: SALAMO – 16: 1 – 2

SINI AUTU: “Ia a’oa’oina tamaiti ia iloa ma mautū lo latou talitonuga, o le Atua lo tatou leoleo sili.

Sina fesoasoani mo le mataupu:

1. O le Salamo o lo’o fa’aulutalaina, o le Salamo a Tavita, o lo’o fa’ailoa ai le agaga fa’afetai o Tavita i le Atua, ona o lona fa’aolaina o ia.
2. O upu amata lava o le Salamo, o lo’o fa’atauanau ai e Tavita le Atua e fai ma ona leoleo, e ala lea i le tu’uina atu o lona fa’atuatuaga ma lona talitonuga mautū, e leoleo lava ma fa’aolaina e le Atua ia mai so’o se faigatā.
3. E lē taumate na avea le Salamo lea ma Salamo na pepese ai Isaraelu i ia vaitaimi, pe ā feagai ma fa’afitauli o le olaga, e fa’amanatu ai pea iā i latou, o le Atua lava lo latou leoleo i taimi uma, e pei foi ona faia i taimi o Tavita.
4. E lelei pea le faitau atoa o le Salamo e malamalama ma faigofie ailau tapenaga mo le Aso Sa.

Galuega Fa’atino:

1. E mafai ona fa’alautele le fa’amatalaina o le fuaiupu. O le uiga o le manatu, ia lē taotasi i le Tusi Faitau, ae mafai ona fa’amatala i tamaiti le tāua o le upu leoleo, ma le galuega a le leoleo e fai, se’ia taunu’u lava i le ‘auga o le mataupu, o le galuega fa’aleoleo a le Atua iā i tatou.
2. E lelei ona i ai ni pepa ma penitala a tamaiti, ona fai lea i ai e tusi ane ni galuega a le leoleo latou te iloa.
3. **Tali nai fesili ia e fa’amautūai le iloa o fanau.**
 1. Efa afefea ona leoleo le Atua iā i tatou? E tele tali o le ā tali ane ai le fanau, tautuanā e aua nei fa’asesēina se tali a le fanau, ae fesoasoani lau Susuga e fa’aatoatoa ma fa’amalamalama a latou tali.
 2. O le ā le umi o le taimi e faigaluega ai le leoleo? Tele foi tali, ae fa’amautu pea le valu itulā o le tagata faigaluega i le aso.
 3. Ae ā la le Atua? **Tali:** E lē tulimoe, e lē moe lava i aso uma, ma taimi uma.
 4. Togi a latou galuega ma fa’amaumau i lau api fa’amolemole.

Fai sau a’oa’oga faigofie mo tamaiti:

1. Ia tumau le fa’atuatua ma le talitonu i le Atua le leoleo sili iā i tatou i taimi uma, pe sologa lelei pe faigatā le olaga, e leoleo pea i tatou e le Atua, e lēmafai ona tulimoe pe moe ma malōlō.

Pese: E lelei pea pese a le tatou Tusi pese e a’oa’o i tamaiti, e te saunia e pepese fiafia ai fanau.

Tatalo: Fa’ata’ita’i tamaiti i si tatalo pu’upu’u lea: “Le Atua e, ia e leelo mai iā tei matou, auā matou te fa’atuatua atu i lau Afio. Amene.

Malō le galulue, fa’afetai le onosa’i, manuia le Aso Sa.

////////////////////////////////////

ASO SA – SETEMA 29, 2019.

MATAUPU: FESILI MA TALÍ’

SINI AUTU: la toe fa’amanatu ma saga fa’amalamalama le iloa o nai fanau i mataupu ua ma’ea ona latou a’oa’oina, aemaise lava le fa’amautūina o lo latou iloa ma le manatuaina o lea tagata ma lea tagata o le Tusi Paia.

Galuega Fa’atino.

1. Pule lau Susuga pe tali fa’atasi pe taito’atasi tamaiti i le taliina o fesili. E i lau Susuga foi le silafia ina o nai tamaiti pe talafeagai ona tusitusi pe leai, e fai lava e lau Susuga le tonu.
2. la mautinoa e fa’amaumau ni togi mo nai fanau i lau api o galuega, ma fa’afetai ma fa’amalō i nai tamaiti i lo latou taumafai.

3. FESILI:

1. O ai Tavita? **Tali:** O le atalii o Iese.
2. O ai foi na fa’au’uina Tavita e fai ma tupu? **Tali:** O Samuelu.
3. Aiseā na filifilia ai Tavita e fai ma tupu? **Tali:** Ona ua lē usita’i Saulo le ulua’i tupu o Isaraelu i le Atua.
4. E to’afia atalii o Iese? **Tali:** E to’afitu.
5. O ai le tamā o Solomona? **Tali:** O Tavita.
6. E to’afia atalii o Tavita? **Tali:** E to’alua.
7. O ai igoa o atalii o Tavita? **Tali:** O Atonia ma Solomona.
8. O ai le isi igoa o Solomona na fa’aigoa ai e le perofeta o Natano? **Tali:** O Ietitaia.
9. O le ā le uiga o le igoa o Ietitaia? **Tali:** “ua alofaina e le Atua”
10. Taumafai e tauloto le Mataio – 28: 19 – 20, e pei ona latou o e a’oa’o i le fale.
11. E to’afia to’alua o Elekana? **Tali:** E to’alua.
12. O ai igoa o to’alua o Elekana? **Tali:** O Penina ma Hana.
13. O ai mātua o Samuelu? **Tali:** O Elekana ma Hana.
14. O fea na ave i ai e Hana Samuelu? **Tali:** Na tu’uina atu i le malumalu e auauna ai i le Alii, e pei ona ia tautō ai i le Atua.
15. Afai e lava le taimi, fa’aopoopo e lau Susuga nisi fesili faigofie, ma fa’amautu i tamaiti tali o fesili olo’o i luga.

Pesepesega: la toe fa’amanatu pese sa outou a’oa’oina mai le amataga, e lelei pea ona fai ni nai taga e ola ai a latou pesega.

Tatalo: Fa’aiu e lau Susuga i se tatalo, ma talosia ai a latou tapenaga mo le Aso Sa o tamaiti;

Manuia le alo atu mo le Lotu a Tamaiti.. alofa atu.

////////////////////////////////////

**OKETOPA 06, 2019 ---- OKETOPA 20, 2019. – MAŌLŌGA MO LE LOTUTAMAITI.
MANUIA TELE LE ASO SA PA’EPA’E O TAMAITI I LENEI TAUSAGA.**

ASO SA – OKETOPA 27, 2019.

MATAUPU: “O FANAU O MEALOF A LE ATUA MO MATUA.”(tofi)

TUSI FAITAU – SALAMO – 127: 3 – 5.

SINI E FA'AMAMAFAINA: Ia a'oa'o i fana ia teu mau i o latou loto ma mafaufau, lo latou t̄aua ua avea ai i latou ma meaalofa a le Atua mo latou m̄t̄ua.

Sina fesoasoani mo le mataupu:

1. E l̄e fou lea mataupu i lau Susuga, ae aua foi le avea lenā ma auala e te fa'alē-ano ai i si au tapenaga mo le Aso Sa. Manatu e leiloa pe fa'atoafa'alogo lea o le isi tamaitiiti i si tala manaia lea. Onosa'i peafa amolemole i nai au tapenapenaga ua e masani ai i vaiaso ta'itasi.
2. O le Salamo lenei e masani ona usuina pe ā latalata i latou o ē o a'e i le malumlau i Ieruselema, e ave taulaga e fa'afetai ai i le Atua, ona o fa'amanuiga a le Atua i o latou aiga. E masani ona fa'atino lea faiga taulaga i ulua'i fua o ā latou fa'ato'aga mai le fanua, ma manu pito lelei mai a latou lafu manu.
3. O le manuia o le aiga i le manatu o le fai-Salamo, o le mea e faia lava e le Atua, ma foa'i mai e le Atua, auā o le Atua lava nate ati'ina a'e le aiga. (fale)
4. O fanau la, o i latou o meaalofa na foa'i mai e le Atua i le aiga, mo matua.
5. O fuaiupu o lo'o fa'aaogaina i le asō, o lo'o ta'ua ai le t̄aua, o fanau ua foa'i mai i m̄t̄ua. E pei o u fanafana i le lima o le toa. E tula'i mai lana fanau ile lumana'i e fa'aea i m̄t̄ua ma a'iga, aemaise o Ekalesia.

Galuega Fa'atino:

1. Fesili i tamaiti pe na fiafia i le Lotu tamaiti ma le malōlōga na feagai. E lelei foi ae fai i ai pe i ai se mea manaia o ona manatua mai le Lotu tamaiti.
2. E lelei pea le fa'aaau le faitau tusi a nai tamaiti i Tusi Faitau o lea Aso Sa ma lea Aso Sa. Ia fua lelei foi e lau Susuga le umi o le faitauga Tusi Paia. Ae aua le taotasi i fuaiupu ua tu'uina atu.
3. Ia saunia e lau Susuga mea nei e fa'aali i tamaiti e vave ai ona iloa ma manatua ia mea o lo'o ta'ua i le Tusi Faitau. (1), o le u poo le ā-u. (2). o le aufana. (3). o le utu.
4. E lelei ona tu'u le avanoa i tamaiti e tusi ane ai e latou ni ata, po'ose lisi o mea latou te fiafia e fai mo m̄t̄ua. Pe tusi foi se lisi o ni gluega latou te fiafia i ai i le lumana'i.
5. Fesili i fanau pe alolofa o latou m̄t̄ua ia i latou, fa'apefea ona latou iloa.? Fa'afofoga lelei pea lau Susuga iā latou tali. Fa'amalamalama e lau Susuga, lo latou t̄aua i m̄t̄ua, aemaise lava o latou o meaalofa a le Atua, mo m̄t̄ua.
6. Pe ā lava le taimi, ia aua le taofia nai fesili sa e tapenaina e fa'aopoopo i le vaivai ua fa'asoa atu. E togi lava e lau Susuga a latou galuega ma fa'amaumau. Aua nei galo le fa'afetai ma fa'amalō i nai tamaiti, ma fa'ailoa i ai se fa'atosina mo le isi vaiaso, ina ia o atu uma ai i le a'oga.

Pese: O lau tapenaga o le vaiaso, e tataua ona tapena ai ma se pese mo le fanau fa'amolemole.

Tatalo faatasi: Le Atua e, a'oa'o atili mai i matou le fanau ia matou alolofa i o matou m̄t̄ua, auā o meaalofa ma tofi i matou mo i latou mai lau Afio. Amene.

Manuia le a'oga i lenei Aso Sa, malō lava le fa'amalolosi.

////////////////////////////////////

ASO SA – NOVEMA 03, 2019

MATAUPU: "E LAVA MA TOTOE LE ALOFA TUNOA O LE ATUA"

TUSI FAITAU- HOSEA – 11: 8 – 9

SINI AUTU: Ia a’oa’oina le fanau ina ia iloa, e lē uma le alofa o le Atua i ona tagata, e tupu pea ma lava ma totoe, auā o le alofa e fa’avavau.

Fesoasoani mo le mataupu:

1. O le vaega o le Tusi Faitau, o lo’o aga’i tonu i le toe liua o le to’asā o le Atua i lona nu’u fa’alogogatata o Isaraelu, ona o lona alofa tunoa tele. E ui lava ina agasala ma lē fa’alogo tagata, ae ua taofi lava le to’asā o le Atua, ona o lona alofa e tupu pea e lē uma.
2. O le nu’u ua fiafia e tapua’i ma alolofa iā Pa’ala, ae fa’agalo lō latou Atua, a’o lea lava e onosa’i le Atua ma fa’apalepale, ona o le tunoa o lona alofa.
3. O upu a le perofeta, o lo’o fa’aalia ai le lē mafai e le Atua ona tu’u lona nu’u e agasala pea ma leaga, ae ua tupu pea lona alofa i tagata ina ia lē fano i le malaia.
4. Fa’amolemole ia fa’aaauu pea le faitauga Tusi Paia a le fanau i Tusi faitau, ae fuafua lelei e lau Susuga le umi e faia ai.

O uiga o nisi upu o lo’o ta’ua i le Tusi faitau e ao ina silafia:

1. **Atama ma Sepoima:** O nu’u ia o lo’o ta’ua o “nu’u laugatasi”, e aofia ai ma Sotoma ma Komoro. Sa fa’atafunaina uma e le Atua nu’u laugatasi ina ua o’o le malaia iā Sotoma ma Komoro. O le ata lea ua fa’aogaina e Hosea e a’oa’o atu ai le finagalo alofa o le Atua iā Isaraelu.

Galuega Fa’atino:

1. Tusi ane e tamaiti ni ata o nu’u laugatasi, ma togi e lau Susuga.
2. Saunia e lau Susuga ni fesili mo le mataupu i lenei Aso Sa mo le fanau. Fa’amolemole, aua le faigatā. E lelei foi ae fa’amalamalama ni nai upu faigatā i le Tusi faitau mo nai tamaiti.
3. E lelei ona amata i ni nai fesili faigofie;
 1. Tamaiti, tou te iloa e alofa le Atua iāte outou?
 2. O ā ni mea e te iloa ai e alofa le Atua iā te outou, po’o oe?

E mafai foi ona fa’ailoa i ai le si’osi’omaga ma lona matagofie, o nisi ia o vaega ua iloa maninoa ai le alofa o le Atua e lē uma mo le tagata. Fa’amatala faigofie pea e lau Susuga ma fa’alautele i ni fa’ata’ita’iga faigofie.

Ia saga fa’amanatu pea i fanau ia a’oa’oina, e tele pea le alofa o le Atua e lē uma, e lava ma totoe auā e tupu pea lava, auā o le alofa e fa’avavau.

Pese: Tele pese e fa’atautu i le alofa o le Atua, ae manaia a si pese lea iāte a’u, peā tusa ai masou finagalo. O le pese #73 o le Tusi Pese a tatou.

Tatalo fa’atasi: Iesu e, ua tele pea lou alofa mo i matou, auā ua lava ma totoe e lē uma. A’oa’o mai ina ia matou iloa ona alolofa atu i lau Afio. Amene.

Manuia le galuega i lenei aso...alofa atu.



ASO SA – NOVEMA 10, 2019

MATAUPU: “SA’ILI MA TATALO I LE ATUA I TAIMI E MAFATIA AI.”

TUSI FAITAU – SALAMO – 18: 6.

SINI E FIA TULILOAINA: Ia a’oa’oina le fanau ia mautinoa i le fa’atuatua a’o tutupu a’e, o lo’o avanoa pea le Atua e saili i ai i le tatalo , pe ā o’o mai mafatiaga ma puapuagā o le olaga.

Mo lau tapenaga, e lelei ona faitau ma’ea le Salamo e oa ai lau tapenaga o le mataupu, o le faigofie foi lenā ona momoli i tamaiti.

1. O le Salamo, o lo’o fa’aulutalaina, o le Salamo a le auauna o Tavita na pese atu ai i le Alii, ina ua lavea’iina ma fa’asaoina o ia mai ona fili, aemaise o Saulo. O lo’o fa’aalia i le Salamo le sa’ili ma vala’au atu o Tavita i le Alii i ona mafatiaga, ma le o’o ifo o le Atua e lavea’i iāte ia.
2. O le Salamo la, e ui ina umi, ae o le pese o le fa’afetai, o le vivi’i atu o Tavita i le Atua, e pei ona fa’aalia i fuaiupu mulimuli lava, atoa ma le fa’aalia o le mata’utia o le Atua ma lona alofa lavea’i i ē ua mafatia ma puapuagatia.
3. Fa’amolemole, aua le faitauina le fesoasoani ua tu’uina atu i le vasega, e mo lau susuga i lau tapenaga, ae fa’amalamalama e lau Susuga i se gagana faigofie ma fialia ai le fanau e fa’alogologo. O lo’o tele pea metotia i lau Susuga e maua ai le fa’amoemoe o lau tapenaga.

Galuega Fa’atino:

1. E lelei ona amata ilou fa’amatalaina o se mea na tupu e lagona ai e fanau le fefe. E pei o se afā, o se mafu’ie, tsunami ma isi puapuaga e lagona ai le fefe.
2. Fa’asolo atu ai i le tatalo a aiga ma nu’u, o le atunu’u ina ia lavea’iina ona tagata. O le fa’amamafa lava ia a’oa’oina tamaiti, a tutupu mafatiaga ma lagona le fefe, ia tatalo ma saili i le Atua e fesoasoani mai, auā o ia lava e fa’asaoina le ola o ona tagata fa’atuatua.
3. Tusi ane ni ā latou ata e fa’ailoa ane ai foliga o le tagata o lo’o vivi’i ma alaga fa’afetai i le Atua. E lelei foi sina fuaiupu se tasi e tusi ane, i ana lava upu e fa’afetai ai i le Atua. Togi a latou galuega ma fa’amalō i nai tamaiti.
4. A lē lava le taimi, ave i le fale se galuega e fa’auma ai mo le vaiaso e soso’o ai.
5. Sina galuega fa’atosina mo tamaiti ina ia lē misi ai le a’oga i le vaiaso fou.

Pese: Saunia e lau Susuga se pese e fa’auma ai le mataupu. Ia ola ma pepese fialia tamaiti.

Tatalo: fa’atasi: Fa’afetai Iesu i lou alofa, e te lavea’iina ai pea imatou mai mailei a le fili ma le tiāpolo, malutia pea i matou i ou a’ao alofa. Amene.

Malō lava le fa’amalolosi, fa’amanuia atu le Atua.

ASO SA – NOVEMA 17, 2019

MATAUPU: “O MEA SILI ONA LELEI E AVE MO LE ALII.”

TUSI FAITAU – KENESE – 4: 4.

AUTU E FA’AMAMAFAINA: Ia amata ona totō i loto ma mafaufau o tamaiti, le iloa ona foa’i mea sili ona lelei ma atoatoa mo le Alii, auāe sisila mai lava o la, e talia ma fa’amanuia mai.

Fesoasoani mo le mataupu:

1. Fautuaina le faitau pea o lau Susuga i le mataupu atoa, ae taula’i lau silasila i le fuaiupu e 1 -15.
2. O Kaino ma Apelu o le fanau a Atamu ma Eva, e matua Kaino ae la’iitiiti Apelu. O Kaino o le tagata galue i le fanua po’o le faifa’atoaga, a’o Apelu o le tagata fai lafu manu, po’o le leoleo mamoe.

3. Ua avatu e Kaino fua ole fanua po’o lana fa’ato’aga e faitaulaga ai i le Atua, a’o Apelu ua ia avatu “ulua’i tama a lona lafu, o manu pepeti lava.”
4. Na silasila le Atua i letaulaga a Apelu ma talia, a’o Kaino ma lana taulaga e le’i silasila i ai le Atua ma lē taliaina, ua te’ena. O le mea ia silafia, na faitaulaga Kaino i le Atua, i fua o lana fa’ato’aga, ae fa’atoa iloa ua i ai le fa’aletonu o lana taulaga, ina ua lē talia.
5. E mafai ona tatou fa’apea, e leaga fua o le fa’ato’aga na fai ai le taulaga a Kaino. Ai lava ua alu atu avane so’o se fua, a ua lē filifili lelei le mea aupito sili ona lelei e fai ai le taulaga. Iape fa’apea foi, ua fai lava tau ina fa’ataunu’u, a ua le faia ma le loto malie atoatoa.
6. O Apelu na ia filifili lelei le manu aupito sili ona lelei ma peti, o le ulua’i tama a le lafu, e faitaulaga ai i le Atua. O mea silisili ona lelei e faitaulaga ai i le Alii.
7. Tautuanā ia faigofie pea le fa’amatalaina o le gagana mo fanau, a ua ta’oto atu si fesoasoani pu’upu’u lenā mo lau Susuga ma lau tapenaga.

Galuega Fa’atino:

1. Galulue ma tamaiti e fa’atino le tala i se fa’atinoga faigofie, o Kaino, na alu atu lava ta’alao ane so’o se fua o le fa’ato’aga, a’o Apelu na matuā mafaufau ma filifili lelei le ulua’i tama o le lafu, e lē gata i le na, a’o le manu aupito peti. Fesoasoani i le fanau. Ia maua e tamaiti le ata o le tala sa fa’amatalaina, ma le i’uga, o lo’o manino lava i le tala, ae fa’apu’upu’u e lau Susuga i lau tapenaga.
2. O le fautuaga, a lelei ona fa’atino le tala lea, o se tapenaga oa lenā mo le Aso Fa’afetai o le ā aga’i atu i ai i le vaiaso fou. E mafai ona fa’atino ai le faigā-aulaga e fa’amatala ai le lagona o le Aso Fa’afetai i le Atua.
3. Afai e lava le taimi, amata loa ona a’oa’o nai pese ma tapenapena lau Susuga ma le fanau mo le Aso Fa’afetai.

Tauloto: (Kenese 4: 7), Fa’amaite ma fa’ata’ita’i e lau Susuga, le fa’aleoina o upu ma fa’ailoga, ae ta’u i tamaiti e o e a’o fa’a-maua ane i le fale, e fa’amanatu atu pea aua nei galo ia te oe, e i ai foi le vaega a matua i le galuega lenā e te lailoa ai.

Pese: Tele pese faigofie ma logo mālie fati mai le tatou Tusi Pese e te filifili ai i se pese mo le nei aso.

Tatalo Fa’atasi: Le Atua e, a’oa’o mai ma fa’amalosi o matou loto, e foa’i atu mea silisili ona lelei mo lau Afio. Amene.

Fautuaga: Taluai o le vaiaso e soso’o ai o le vaiaso e fa’amanatu ai le Aso Fa’afetai, o lea e sōsō atu ai i le agaga maulalo, pe mafai ona talanoa i fanau e o ane ma ni nai fua o fa’atoaga e fa’atino ai le mataupu. O le lagona, e lē fa’amatalaina i tamaiti le talafa’asolopito o le aso lea, ae fa’amaite i tamaiti, le fa’atinoga lea ua masani ona vā’i i ai i latou i Sauniga o Aso Fa’afetai. Ua nā o se fautuaga, ae pule lau Susuga.

Manuia le galuega o le nei aso..manuia foi tapuaiga o le Aso Sa.

ASO SA – NOVEMA 24, 2019. “ASO FA’AFETAI”

MATAUPU: “O LE TIUTE O LE KERISIANO, IA OLA FAITAUAGA MA FAI MEAALOFA.”

TUSI FAITAU: KENESE- 1: 3.

SINI AUTU: Ia fa’amamafa i tamaiti, ia iloa i lo latou tutupu a’e, e tāua le faitaulaga ma foa’i meaalofa i le Atua, ma isi tagata.

Sina fesoasoani mo lau Susuga a le faiaoga:

1. Masalo o le ā e faitio mai foi i si tusitala, ua tutusa Tusi Faitau o le Aso Sa ua mavae ma lenei Aso Sa. Ia e lē afaina lea, ae tau lava ina sōsō atu i le agaga maualalo, o le oa atili lenā o lau tapenaga mo tamaiti, a’o fa’amamafa, o nai fea’u tāua ia o lo’o fia momoli i le fa’alogo a fanau iti ia mo le lumana’i.
2. O le fa’amamafa o lenei Aso Sa ia fiafia e faitaulaga ma foa’i meaalofa mo le Atua.
3. Taula’i lau silasila i le fuaiupu o lo’o fa’amamafa atu (f: 3), o lo’o i ai upu ia, “Ua o’o ina atoa o aso,” ona avatu ai lea e Kaino o le fua o le fanua o le taulaga i le Alii.
4. “Ina ua atoa o aso,” o lona uiga, ua matua le fa’ato’aga, ua o’o i aso e tataua ona selesele ai. Le tāua lenā o le mea na faia e Kaino, ua selesele le fa’atoaga, ua matua ona fua, e fai ai le taulaga i le Atua, auā o le Atua na fa’amanuaina le lau’ele’ele ma fua ai lana fa’atoaga.
5. E ui lava ia ina lē talia le taulaga a Kaino, a’o le fa’amamafa o le mataupu, ia iloa ona foa’i meaalofa ma faitaulaga e fa’afetai ai i le Atua, e ona manuia ua manuia ai taumafaiga uma a le tagata i mea ua foa’i mai e le Atua.
6. O le agaga lenā o le Aso fa’afetai i le Aso Tofi, e fa’amamafa i tamaiti, o le tiute o le Kerisiano, ia ola faitaulaga ma foa’i meaalofa mo le Atua ma isi tagata, o le ata o le fa’aaliga o le loto fa’amalieina ma le fa’afetai i le Atua, auā o ia le pogai o mealelei uma e manuia ai le tagata.

Galuega Fa’atino:

1. Afai na o ane tamaiti ma ni fua o fa’atoaga, o le ā matua malamalama lelei lava la si fanau i le mataupu sa e lailoa ai e fa’amatala.
2. Fa’amalamalama lelei i tamaiti, a matua le fa’atoaga, ave se maukeni ma se ‘ato talo ma le Faifeau, o le uiga lenā o le faitaulaga i le Atua. E lē o le Faifeau le Atua, a ia malamalama, o le Faifeau o lo’o fa’aailoa maia le finagalo o le Atua i tagata, ma tatalo i le Atua e fa’amanuia a latou fa’atoaga ia fua lelei.
3. E lē gata i le faifeau, a ia fiafia foi e foa’i mea alofa mo isi tagata, auā o lo’o silafia e le Atua ma fa’amanuia i latou i so’o se ala.
4. Fa’amamafa i tamaiti a’o fai lenei fa’atinoga, o le faitaulaga ma foa’i meaalofa mo le Atua, o le tali fa’afetai lenā a le Kerisiano i le alofa lē fa’amatalaina o le Atua i aso uma. Ta’u i tamaiti, e lē taitai ona tutusa ma lava ā tatou foa’i ma taulaga, e tali ai le tunoa o le alofa silisili o le Atua.
5. Afai e tele le seleselega a lau vasega, ia fai sau fa’asoa ma fa’ata’ita’i i tamaiti ona o e tufa ma fa’asoa i tou faiaoga, ia po’o nisi foi o le aulotu uao’o ane i le Falesā ae le’i ma’ea le aoga o lenei aso. E lelei foi ona ta’u i nai tamaiti ni upu faigofie e momoli ai meaalofa e amata fa’amasani ai i lea aga, ua amata ona lē iloa e tamaiti fa’atino. A ia latou iloa ai foi le upu o le ā tali ane ai le tagata o le ā o’o i ai le tufa.
6. O le a’oa’oga sili leao le mataupu, o le foa’i ma le talia i le agaga o le fa’afetai, e lē tataua ona uma.

Tauloto: O le galuega lava lenā a le fanau mo le aiga e fesoasoani i ai matua. O le fuaiupu e 3, ia fai lenā ma tauloto, e fa’amanatu pea mo i latou i Aso Fa’afetai i tausaga uma.

Pese: Afai na e tapena mo se pese o le Aso Faafetai, ua matuā ‘ova lava lau Susuga i le masina, ae afai ua galo, o le Tusi pese a tatou le tali lelei o so’o se pese talafeagai, a’o le fa’amoemoe ia amata ona fa’afiafia tamaiti i ā tatou lava pese.

Tatalo: Saunia e lau Susuga se tatalo e fa'ai'u ai le mataupu, ma talosia atu ai le Aso Fa'afetai i le Aso Tofi, ma fa'amalosi i tamaiti e o ane i le lotu.

Manuia tele le Aso Fa'afetai i lau Susuga ma le fanau..alofa tele atu.

ASO SA – Tesema 01, 2019.

MATAUPU: “UA FA'AALI LE AGELU IĀ IOSEFA I LE MITI”

TUSI FAITAU: MATAI O – 1: 20 – 22.

SINI AUTU: Ia fa'ama'ite le a'oa'oina o fanau i le auala na fa'aali ai le Atua iā Iosefa, e uiga i le tama o le ā fanau mai.”

Sina fesoasoani mo le mataupu:

1. A'oa'o pea le faitau Tusi Paia a nai tamaiti, e manaia foi ae amata le tou faitauga i lenei Aso Sa i le fuaiupu e 18 – 25.
2. O fuaiupu ua filifilia mo lenei mataupu, o le fa'amatalaina o le fa'aali mai o le agelu iā Iosefa i le miti: O mea nei o lo'o ta'ua i le miti: 1. Aua e te fefe. 2. Aumai iā te oe o Maria lau avā. 3. Auā o lana to mai le Agaga Paia lea. 4. E fanau mai e ia le tama tane. 5. E fa'aigoa foi iā te ia o Iesu. 6. Auā e fa'aola e ia lona nu'u ai ālatou agasala.
3. Ua vaevae atu fa'afaigofie ona fa'amatala vaega o le miti. O lo'o ta'ua ai foi ma le uiga o le igoa o Iesu, **“O le fa'aola.”** O le fa'amamafa atoa lea o le mataupu o lenei taeao, ia a'oa'oina nai tamaiti i le miti a Iosefa na fa'aali ai le Atua e uiga i le fanau mai o Iesu.
4. A maumautai na mea ia ma le uiga o le igoa o Iesu, ua lava ma totoe fa'alumaga o nai fanau i lenei Aso Sa, a'o aga'i atu i le Kerisimasi.
5. Aua le vaoia ai lau tapenaga, saili pea le fa'alauteleina i le faitauina o le Tusi Faitau, ma fatufatu ai manatu ma le gagana faigofie mo le fanau i lona fa'alauteleaga.

Galuega Fa'atino:

1. E lelei ona tou talatalanoa i miti. Fesili i tamaiti po'o le āso latou iloa o lea mea, e fa'apefea ona tupu, a'o le āle taimi e masani ona tupu ai, ma nisi lava manatu. Afai na tupu i se tamaitiiti, tu'u i ai le avanoa e fa'amatalaane ai lana miti, a o le ā se lagona nao o iā te ia, pei o le fefe ma isi lagona fa apenā.
2. Ona e taumafai loa lea e ta'u i ai, o le auala tonu lenā o lo'o fa'ailoa mai i le tala, na talanoa ai le Atua ma Iosefa, pe na fa'aali ai le Atua iā Iosefa, o le miti.
3. Fa'ailoa i tamaiti le taunu'uga po'o le uiga o le miti, o le pepe po'o le tama o le ā fanau mai iā Maria lana avā, e fa'aigoa iā Iesu, o lona uiga o le fa'aola, auā e fa'aola e ia lona nu'u mai agasala.

Tusiga ata:

1. Tufa i tamaiti ni pepa e tusi ane ai se ata o Iosefa, o lo'o ta'oto e moe, ma se agelu o lo'o fa'aali ane iā te ia le fe'au mai le Atua e uiga i le fanau mai o Iesu.
2. E lelei ona fa'amatala a latou ata, e ala i le tusia o ni upu i talane o ata, e pei o le nei, afai o Iosefa, tusi ai i talane le igoa o Iosefa o loo moe, ma fa'apena ai lava.
3. Ia togi ata a tamaiti, ma ave i ai se fa'afetai ma se fa'amalō, ina ia amana'iaina ai lo latou fiafia e tusi ata.

4. Fa'ata'ita'i e lau Susuga le fa'aleoina o le tauloto i fanau ae fa'amausalile maua mai le fesoasoani a ona mātua.

Tauloto: Taumafai ia tauloto uiga o igoa ia:

1. Iesu – O le Fa'aola.
2. Emanuelu – Ua ia te'i tatou le Alii.
3. A'o le fuaiupu 22 – 23, e fai ma tauloto i le aiga.

Pese :Amata ona a'oa'oina ni nai pese mo le Kerisimasi a nai fanau. E tele foi pese Kerisimasi i le tatou Tusi pese. Ae pule lava lau Susuga.

Tatalo: Fa'aiu i se tatalo e se tamaita'i o le vasega, ma tatalo fa'atasi i le tatalo a le Alii.

Fa'afetai le onosa'i..ua toe lava o le vaiaso lea ona maua lea o sina mapu teisi.

ASO SA – TESEMA 08, 2019

MATUPU: FESILI MA TALI.

SINI AUTU:la toe fesili i tamaiti e toe fa'amanatu ma fa'amautū nai mataupu sa e gapātia ai e a'oa'oina, aemaise si fanau. E te silafia ai foi le isi la'asaga o le ā la'a i ai au tapenaga, e fua i lo latou manatua ma le tali ane.

Fesoasoani mo le mataupu:

1. E pule lau Susuga pe tali fa'atasi pe tali ta'ito'atasi le vasega, e lē taofia foi pe afai e te silafia ua mafai ona tusi tali pupu'u e le fanau, ae aua le fa'amalosia se faiga e lē mafai e fanau fa'amolemole.
2. Ia togi ma fa'amaumau i lau api o latou togi e maua, ave i tamaiti o latou togi e ave e va'ava'ai i ai o latou mātua.
3. E lē fa'amamafaina atu e le Ofisa se laugatogi mo fanau, o le matafaioi lea a Toea'iina ma Fa'afegaiga o aulotu ta'itasi, pe ā talafeagai.
4. O mataupu o lo'o fa'aogaina i fesili o le Aso Sa lenei, e amata mai iā Oketopa 27, 2019 – Tesema 01, 2019.
5. E lē se agasala pe ā fa'atu'ua lau vasega i sina aisakulimi ma si vai 'aisa ma si fanau e fa'auma ai galuega o le tausaga. Fai atu ai foi! Va'ai i le manaia!!!

Fesili:

1. Aiseā e tāua ai fanau i mātua? **Tali:** Auā o fanau o meaalofa/ tau/tofi, mai le Atua mo mātua.
2. O ē manatua mea ua fa'atusa i ai fanau i totonu o se aiga. **Tali:** O u fanafana i lima o le toa.
3. O le ā foi le mea e ta'u o le utu ma le aufana? **Tali:** aufana: O le la'au fa'a-afa masina e nonoa ai le manoa i ona pito e lua, e fa'aaoga e tu'u ai le u i le manoa ona meme'i lea ina ia lele mamao le u. 2. Utu: o le taga e tu'u ai ā-u a le toa, e nonoa i lona patua.
4. O le ā le uiga o igoa o nu'u nei? **Tali:** Atama ma Sepoima: "o nu'u laugatasi"
5. O a ni mea e te iloa ai, e alofa mai ai le Atua iāte oe? **Tali:** O le ā tali ane lava le fanau, ae togi e lau Susuga.
6. E uma le alofa o le Atua iāte oe pe leai? **Tali :** Leai.
7. Ae lava le alofa o le Atua iā te oe? **Tali:** loe, e lava ma totoe.

8. Pe ā e fefe i se mea faigatā, o ai e te tatalo i ai? **Tali:** o le Atua.
9. O ai Kaino ma Apelu? **Tali:** O le fanau a Atamu ma Eva.
10. O le ā le galuega a Kaino? **Tali:** o le galue fanua po’o le fa’ato’aga.
11. O le ā le galuega a Apelu? **Tali:** O le fai lafu manu po’o le leoleo mamoe.
12. O ai o Kaino ma Apelu e matua? **Tali:** O Kaino.
13. Aiseā na ita ai Kaino iā Apelu? **Tali:** Ona ua lē talia lana taulaga e le Atua.
14. A fai sau taulaga i le Atua, o le ā le mea e tatau ona e faia? **Tali:** Filifili e ave le mea aupito silisili ona lelei.
15. Aiseā e tatau ai ona faitaulaga ma foa’i meaalofa a le tagata Kerisiano mo le Atua? **Tali:** e fa’afetai ai i le Atua i mea uma ua ia foa’i mai ma manuia ai le tagata.
16. O ā uiga o Igoa nei: Iesu ma Emanuelu? **Tali:** Iesu – “O le fa’aola” Emanuelu – “Ua iā te’i tatou le Alii.”
17. Manuia le taligā fesili, fesoasoani pea lau Susuga pe a mana’omia le toe fa’amanatu i fanau tali o nai fesili na, ae fa’amolemole toe fa’afaigofie ane, ona ua gata le malosi o le tusitala.

Pese; O pese lava mo le tapenaga o le Kerisimasi ma lona vaitau, ia pepese fiafia le fanau.

Tatalo: Fa’aiu e lau Susuga si au vasega i le tatalo, ma talosia ai le tu’uaga o le Kerisimasi ma le Tausaga fou.

Malō le galulue, fa’afetai le onosa’i..manuia le tu’uaga.

Upu Fa’ai’u: Faia lou tagata ma fofoga o le Ofisa, e momoli atu le fa’amalō ma le fa’afetai iā outou Susuga i faiaoga o le Vasega amata lua i lenei lima masina, a’o tau amata lenei taumafaiga fou o le a’oa’oina o fanau. Fa’afetai tele le onosa’i, malō le galulue, aemaise lava o le lava papale i fa’aletonu o le matou pito la’au. Fa’amagalalo le Ofisa. Fa’amanuia atu le Atua ma toe fa’atutumu lo outou tamāoaiga ua to’esea ona o le taumafaiga o le a’oa’oina o fanau i nu’u ma aulotu. Ia fa’amanuia tele le Atua i so’o se ala na e foa’i ai mo fanau. Fa’afetai, Fa’afetai, Fa’afetai tele lava. Malō le galulue ma le fitā i tuga mo le Atua ma lana galuega. Tatou fa’apea ane lā’ia, o tatou o auauna lē aoga, ae faia so tatou fa’atauva’a i le galuega, ia maua ai se vi’iga o le Atua, ae aua lava nei iā te i tatou.

A’o alo atu i le tu’uaga ma malōlōga o aso fiafia, matou te momoli atu fa’amanuiaga ma alofaaga, i Susuga i Toea’iina ma Faletua, Susuga i Fa’afeagaiga ma Faletua, aemaise o faiaoga na gapātia i lenei galuega. Ia maua se Kerisimasi fiafia ma se Tausaga Fou e tumu i manuia, i le agalelei mai o le Atua. Tatou feiloa i le Tausaga Fou pe ā pule alofa le Atua tatou te aulia, ma sopo atu i ai lo outou soifua ma lo matou ola. Manuia tele le Kerisimasi ma le Tausaga Fou.

Soifua: Aufaigaluega Ofisa A’oa’oga Kerisiano. EFKAS.



Tautua Printing Press
Congregational Christian Church of American Samoa
1 Kanana Fou Street, Box 1537
Pago Pago, American Samoa 96799
www.efkasonline.org